

MATERIALES D'ANTROPOLOXÍA

La aldea o'l pueblu comu estructura socioeconómica vertebradora del poblamientu rural asturianu

JAVIER FERNÁNDEZ CONDE

Esta tesis ye perimportante pa les investigaciones sobre la sociedá rural asturiana de les Edaes Media y Moderna. Y pámeque tamién tien importancia pa columbrar meyor qué se pue facer coles nuestros aldees n'actualidá, ya qu'a naide se-y tapez qu'esa sociedá rural asturiana ta al borde de la desapaición definitiva y de la muerte. Ye tamién evidente que los responsables de la política económica d'una realidá social, si nun quieren dar “palos de ciegu” nos sos proyeutos, tán obligaos, ensin remedi, a tener un conocimientu fondu d'esos realidaes.

Dalgunos xeógrafos ya hestoriadores tán avezaos a dicir nos sos estudios asoleyaos, que la parroquia —non l'aldea— ye la “célula rural primaria” del paisaxe agrariu del nuestro país¹.

Güei ta perclaro que la parroquia nun pue ser esa “unidad fundamental”. El cristianismu llega a Asturias na tarda romanidá o un poco más tarde. Y, d'otra parte, el sistema parroquial, comu estructura alministrativa dafechamente constituyida, nun se fai realidá fasta bien entráu'l

¹ “Ésta (la entidad parroquial) maniéstase comu la célula básica, social y económicamente, parceladora del espaciu concexil”. F.Rodríguez Gutiérrez, *La organización agraria de la montaña central asturiana*, Uviéu, 1989, p.144. Y sostién lo mesmo en *Transformación y crisis de un espacio de montaña: el concejo de Lena*, Lena/Asturies, 1984. Tamién: “La organización del espacio histórico en Asturias”, *Ería*, 17, (1988). Dalgunos hestoriadores faen lo mesmo nes sos obres: “En la comunidad parroquial hay unidad religiosa, económica y disciplinaria, igual que en la “gens””: R.Prieto Bances, *Obra escrita*, v.II, p.1183. “La célula local primaria del medio rural asturiano es la parroquia o feligresía: J.I.Ruiz de la Peña Solar, *Historia de Asturias* (ed. Ayalga), v.V: *Baja Edad Media*, p.76.

Sicasí, el xeógrafu García Fernández dexaba bien afitao que la unidá fundamental de la sociedá rural yera l'aldea y non la parroquia: J.García Fernández, *Sociedad y organización tradicional del espacio en Asturias*, pp. 62 y 68 y ss.

Medievu, ye dicir, fasta los sieglos XI o XII. Poro, nos tiempos anteriores, n' Asturias y fuera d' Asturias, la aldea o'l pueblu yera esa "célula básica" del poblamientu.

Y pa con eso, les aldees asturianas —y les de les otres rexones cercanes a Asturias— nun fueron creaciones espontanees o arbitrarias, sinón organizaes polos señores feudales a partir de la evolución de les *villae* tardorromanes y de les primitives comunidaes d'aldea, venceyaes a los vieyos grupos xentilicios de la nuestra tierra².

El *Libro del Prior*, que respunde a les carauterístiques codicolóxicques d'un gran *Apeo*, un manuscritu llarguísimu y mui bien conserváu del Archivu Capitular d'Uviéu —nn.39 y 40 del so Catálogu—, elaboráu polos canonxes de la catedral nos postreros años del sieglu XV, pa controlar y tener una conocencia esauta de les sos tierres, espardíes per toa Asturias, rescampla, ensin nenguna dulda, la tesis formulada nel títulu d'esti trabayu so la naturaleza de l'aldea. Paeznos que les coses nun camudaron muncho dende la Época Moderna fasta los tiempos recientes³.

Les partíes d'heredaes del Cabildu d'Uviéu, pertenecientes a dixebraes unidaes alministratives —celleros, eríes o lloses por exemplu— apaecen, davezu, lligaes non a parroquies, sinón a distintes aldees⁴. Y en delles ocasiones del llargu testu del manuscritu l'autor pue facer un par de referencies p'asitiar correutamente un llugar o una heredá capitular:

"Juraron los susodichos que en la aldea del casar que pertenesçen al çellero der Vernuezes..."⁵ En munchos d'estos apeos apeos capitulares suel atopase tamién una constante formal p'asitiar correutamente una heredá aislada o un conxuntu d'heredaes. Cuandu faen mención d'una aldea o d'otra unidá alministrativa, rellaciónenla, cuasi siempre, col conceyu, non cola parroquia a la que pertenez:

"En la aldea de Jove, que es en el conçejo de Gijón ... dixo que pedía a su merçed sacase perquisa e enformación de la renta de Matajove..."⁶.

² Los estudios asoleyaos sobre las comunidaes d'aldea en cuantes creación feudal son yá munchos dende los trabayos "yá clásicos" de A. Barbero, R. Pastor o J.M. Mínguez. Puen vese dalgunes consideraciones xenerales en J.A. García de Cortázar, "Organización social del espacio: propuestas de reflexión y análisis histórico de sus unidades en la España medieval": *Studia historica*, VI, (1988), 195-236. Una miscelánea dirixida por esti mesmu autor: *Organización del espacio en la España medieval: la Corona de Castilla en los siglos VIII al XV*, Barcelona, 1985. Tamién: *Les communautés villageoises en Europe occidentale du Moyen Âge aux temps modernes*, Auch, 1982 (Centre Culturel de l'Abbay de Fiaran).

³ Cfr. un estudiu ampliu sobre el LP: F.J.Fernández Conde, *El Cabildo de Ovetense. Estructuras agrarias de Asturias en el tardo Medievo*, Uviéu, 1993.

⁴ E.c.: "Iten juraron los sobredichos que en la aldea del Casar estava otra tierra...": *Libro del Prior (LD)*, v.I, f.9r.

⁵ LP, I, f.125v.

⁶ LP, I, f.10r.

Una cosa taba perfeutamente clara pa los autores y testigos d'esti apéu o rexistru de bienes pertenecientes al cabildu uvieín: que l'aldea y la parroquia yeren realidaes bien estremaes una de la otra. Y esta distinción ye válida, tanto pa les parroquies con munches aldees —parroquies polinucleares— perabundantes na fastera marítima y nes comarques de les Asturies centrales, comu naquelles otres parroquies o feligresíes pequeñes —parroquies mononucleares—, asitiaes nes partes más montañoses y elevaes. El *Libro del Prior* ufierta bayura d'espresivos testos, ensin confundise los escribanos y ensin que se-yos esmuzan los significaos d'una cosa o d'otra:

Un exemplu de parroquies con una sola aldea:

“... Fernán Pacho, canónigo, presentó por testigos a ... vezinos de la dicha aldea de La Mesa ... dixerón que la dicha iglesia de Santa María Madaglena (*sic*) de La Mesa del Campo e feligresía della se determinavan por los términos e límites e confines ... dixerón que toda la dicha aldea de La Mesa que segund se determinava por los dichos términos a monte e a valle se repartía en esta manera ...”⁷.

Otru, ente muchos, de parroquies polinucleares:

“Son anexas a la dicha felegresía (de Santa María de Argança) las aldeas de Argança e Agüero e Carriles e Semellón de Çima e Semellón de Abaxo e Robledo e la Cortina e Poço e La Lama e Villorín”⁸.

Los responsables d'esti apéu capitular persabíen qu'en cualquier de los casos ufiertaos y escoyíos equí al azar, porque'l *LP* contién muchos exemplos, nun esistía sinonimia ente “aldea” y “parroquia”, sinon tolo contrario, ye dicir, que yeren dos términos con significaciones bien estremaes. Cada términu referíase a una realidá distinta con funciones sociales y económicas distintes, definíes nel mesmu testu.

Muchos de los pueblos o aldees del *LP* taben amestaes —“anexas”, según los escribanos— a una ilesia parroquial que yera comu la erbía xurídica pa poder axuntar y coyer más fácilmente tola renta del celleru señorial, espartida pelos pueblos o aldees de les respetives parroquies: la *decimal*, correspondiente al cobru de los diezmos, la *beneficial*, percibida de los beneficios eclesiásticos esistentes naquella ilesia parroquial, la *solariega*, que venía de les ren-

⁷ *LP*, II, f. 32v.-33r.

⁸ *LP*, II, f. 5v.

tes pagaes pola tenencia de tierras concretes, y, finalmente, la *señorial* propiamente dicha, nel casu qu'esistiera, porque nos sieglos postreros del Medievu, les cargues señoriales convirtiérense, la mayoría de les veces, en cantidaes de dineru comu les otres rentes.

Les aldees, si yeren un poco grandes, podíen tener un templu pequeñu, siempre de menor rangu o categoría que'l correspondiente a la ilesia parroquial: esti templu nun llevaba la nómina d'ilesia sinón d'*ermita*, nun recibía el diezmu de los aldeanos y nun alministraba con regularidá los sacramentos; en realidá, namás daba la misa o eucaristía dalgún día de fiesta, y de forma especial, na celebración del so patronu o titular; si tenía dalgún ingresu benefical, el cobru del mesmu axustábase, nes sos proporciones, a lo estableció pa los diezmos, que namás podía cobrar la ilesia parroquial. Los celleros del arcedianatu de Tinéu, descritos entoncies polos responsables del LP, ufierten munches noticies sobre esti particular:

Celleru de *San Damías de Tebongu*:

“E que son anexas a dezmar en la dicha feligresía (*Tebongu*) las aldeas de Tebongo el Pueblo e Villar de Tebongo e Santa Çeçilia e la meytad de Portiella e Robredo e la meytad de Biescas e sy la meytad de Castrosyn, segund están en costumbre. E que son *fixuelas* desta dicha eglesia las *hermitas* de Santa María Madalena del Pueblo e Sant Martino de Rubieros e Santa Çeçilia e Santa Olalla de Portiella e Santa María de Entrago. E que lo que ofresçe en estas dichas *hermytas* quando se allegan algunas gentes por deboçión, *que se reparte según los diezmos*, salvo la *hermita* de Entrago, que está en la heredad de sennorío e está en diferençia quien lo ha de aver”⁹.

Celleru de Sant Christóval de Cangas

Otrosy, dixerón que heran *fixuelas* de la dicha iglesia de Sant Christóval las *hermitas* de Santo Andrés, de San Juan de Rannezes e Sant Pedro de Ruycabo e Sant Cosme de Villasemada; e quando ay alguna congregaçión de gentes, lo que allí se gana, liévanlo los herederos que las dotaron. Dixerón que las aldeas e vezinos dellas, que deznavan en la dicha iglesia de Sant Christóval, eran de Villasemada e çiertos pueblos de Villanueva e la aldea de Ruycabo e Rannezes e Robledo e Robacán e La Branna e Santianes”¹⁰.

Delles veces, dalguna de les *ermites-fixueles* de la ilesia parroquial algamaba una categoría

⁹ LP., II, f. 10v.

¹⁰ LP., II, f. 14r.

intermedia ente les ilesies parroquiales propiamente diches y les pequeñes y probes ermites aldeanes. Éstes, ye dicir, les *fixueles*, teníen capacidá d'administrar los sacramentos, pero nun podíen recibir les rentes beneficiales ordinaries comu los diezmos y les primicies que yeren cobraes pola ilesia "madre" o parroquial:

Testu del apéu de San Pedro de la Pola de Tinéu:

"Son anexas a este préstamo (*S. Pedro-Tinéu*) las iglesias de Santa María de Mannores e San Justo de Pedregal. E dixeron que lo que ofrescí en las dichas iglesias los de Manores se partía como lo de San Pedro o lo de San Justo, los vezinos, que asy avían fecho la hermita, estava por sentençia que ellos llevasen el un terçio; e los otros dos terçios los levasen el capellán e el préstamo e los beneficiados. Iten dixeron que deznavan en esta dicha iglesia de San Pedro de la Pola de Tineo las aldeas de Mannores e Fuejo e Bárzana e Valserondo e el Faedo e Faedal e el Pedregal"¹¹.

La ilesia de Santa María de Mannores, que nel entamu de la organización del sistema parroquial nos siglos XI y XII fuera parroquia, durante les décadas caberes del XIV convirtiérase yá en *fixuela* de San Pedro de Tinéu, según les noticies aportaes por D.Gutierre de Toledo, obispu d'Uviéu. Sabemos tamién que San Xustu y Pastor de Pedregal tenía la mesma categoría de sometimientu n'época Moderna¹².

La diferencia de categoría de los templos na sociedá rural asturiana tien un significáu históricu perimportante pa llograr una conocencia cabera d'esa sociedá fasta les sos más fonderes entretales, con perclares connotaciones feudales. Tamién esistíen tres clases d'ilesies; la so posición na pirámide xerárquica de les mesmes venía determinada pola cantidá y calidá d'ingresos percibíos por caúna y, comu consecuencia, pola capacidá d'administrar los sacramentos y facer el cultu:

Ilesies parroquiales.... Ingresos beneficiales fixos (diezmos-Sacramentos primicies). Toa clase de cultu. Nun dependíen de nenguna ilesia.

¹¹ LP, II, f.2v.

¹² "Santa María de Mangnores fue parrocha. Agora es fijuela de San Pedro de la Puebla": F.J.Fernández Conde, *La Iglesia de Asturias en la baja Edad Media. Estructuras económico- y administrativas*, Oviedo, 1987, p.187 (Estadística de la diócesis de Asturias realizada bajo el patrocinio de D.Gutierre: 1377-89)

Ilesies anexes (fixueles). Ingresos beneficiales parciales(nin diezmos nin primicies)¹³. Sacramentos
Cultu.
Dependíen d'una ilesia parroquial.

Ermites..... Ingresos devocionales (ufiertes)
Cultu devocional (fiestes del patrón)
Dependíen d'una ilesia, parroquial o *fixuela*.

Los pueblos o aldees que yeren parte d'una feligresía o parroquia dependíen, xurídica y económicamente, de la respetiva ilesia parroquial. Esti sometimientu yera igual pa toles aldees o parte d'elles que pagaren diezmos y primicies a aquella ilesia parroquial. Nuna d'esas aldees levantábase, lóxicamente, la ilesia parroquial, pero esti fechu nun cambiaba pa nada la situación xurídico-económica de los vecinos d'aquella aldea. En definitiva, pue dicese que la contribución decimal —y de primicies— de tolos aldeanos y vecinos o de parte dellos, yera'l factor determinativu de la so dependencia parroquial.

Ye evidente que la xeografía parroquial y la xeografía decimal andaben mui amestaes, dependiendo una de la otra. Esti fenómenu, referímosnos a la contribución decimal, al facese obligatoriu n'Asturies ente l'añu 1000 y el 1100¹⁴, foi decisivu pa iguar el mapa parroquial y esto hai que lo calibrar a la hora d'investigar les llendes d'una parroquia na actualidá. El siguir mecánicamente los accidentes xeográficos o naturales pa establecer les llendes “racionales” d'una circunscripción parroquial o fíxase únicamente nes aldees o pueblos que güei la configuren, podría conducirnos a grandes enquivocos. La complexidá de les llendes de la parroquia de San Salvador de Tol podía ser un bon exemplu de too esto:

“E dixerón que eran anexas a la dicha ilesia de San Salvador la aldea de Tol e Brul, salvo un feligrés que es de Serantes e Baurio: la meytad, la otra meytad es de San Juan

Cfr. también el celleru de Santa Eulalia de Sorriba:

“Son *fixuelas* desta dicha ilesia de Santa Olalla de Sorriba: San Pedro e Santa María Madaglena de Prando e Santi Lifonso de Villanueva. E quando heran los días de los vocablos e avía alguna congregación de gentes, levavan los renderos e capellanes que hera de la dicha ilesia de Santa Olalla de Sorriba, todo lo que se ofrescía en ellas, salvo que de Santi Lifonso levavan la meytad e la otra meytad herederos que dotaron la dicha *hermita*”: LP, II, f.4r.

¹³ Son bien raros los casos nos que les ermites aldeanos perciben diezmos y primicies nel testu del *Libro del Prior*: F.J.Fernández Conde, *El Señorío...*, p.257 (nt.101).

¹⁴ Sobre la problemática decimal, con bayura de bibliografía: F.J.Fernández Conde, *El Señorío...*, pp.167 y ss. (“La fiscalidad decimal”).

de Moldes, e San Cristóval e el Ferredal e el monte de los Heyros e Villasenil e Magosteyras e la cuarta parte de la aldea de Casariego e la ochava parte de todas las heredades de Mántares (*sic*) e de Tapia e Santo Estévano que son fijosdalgo: las quales pagavan el diezmo de la dicha iglesia”¹⁵.

De tolo dicho fasta equí, pue persacase de xuru que pueblu o aldea y parroquia o feligresía son realidaes sociales y alministratives completamente diferenciaes pola so estructura y tamién poles sos funcionalidaes específiques. La primera, ye dicir, l’aldea o pueblu, coles sos llendes y finsos perfeutamente definíos, ye la base y l’empobinamientu de toles rrellaciones económico-sociales del conxuntu de vecinos que la formen, con toles tierres —*el terralgu*— dependientes d’ella. La parroquia, pel so llau, ye una institución artificial, muncho más seronda que les aldeas, pos nun escomencipia a organizase n’Asturies fasta les primeres centuries del Medievu. Ta tamién perfeutamente delimitada y les sos funciones son siempre relixoses —l’alministración de los sacramentos y el cultu— y tamién económiques, ya que controlaba y recibía les cargues fiscales —diezmos y primicies— de toles aldees o pueblos que taben sometíos a ella na totalidá o solamente n’alguna parte o d’algunos vecinos dependientes d’ella. Ye perclaro que delles veces los vecinos d’una aldea podíen depender de parroquies distintes. Nel exemplu de San Salvador de Tol, arriba mentáu, apaez esta diferencia con muncha claridá.

Ye por eso que nun se pue falar de parroquia comu’l pubin del poblamientu rural —“célula rural primaria”—. Quiciabes podría dicise d’aquelles parroquies con un solu pueblu, asitiaes nes zones de montaña col *hábitat* perconcentráu. Pero, nesos casos, parroquia y aldea tenfen entovía naturaleza y funciones completamente estremaes, que convién siempre estremar pa nun equivocase.

Delles veces, nes investigaciones de campu, alcontramos diferencies notables na toponimia y na llingua d’aldees prósimes, que pertenecíen a la mesma parroquia.

Toes estes precisiones, fasta equí feches, nun son válides solamente pa la Edá Media, que ye’l oxetu principal de les mios investigaciones. Hai unos pocos años namás, un grupu de xóvenes investigadores d’un proyeutu hestóricu-antropolóxicu que yo tuvi la suerte de dirixir, llegaron a les mesmes conclusiones al estudiar los pueblos de dos conceyos montañosos de

¹⁵ LP, II, f.55r.

l'Asturies central, en concretu, Quirós y Teberga. Al rematar los sos respetivos trabayos, asoleyaos yá na Revista *Cultures* y nel *Boletín del IDEA*, afirmaben lo siguiente:

“Partiendo de la idea de que'l pueblu (*aldea*) ye la unidá económica qu'articula la explotación del espaciu rural, tentemos de demostrar que'l pueblu funciona tamién comu una unidá social fundamental pa los sos integrantes. De la realización de los llabores que faen en común toos o parte de los vecinos d'un pueblu, surden una riestra de llazos de calter social que son pa ellos un referente fundamental. Ye por eso polo que los quirosanos encuestaos siéntense vecinos y miembros del so pueblu antes que componentes d'una parroquia en concreto, aspeutu esti nel qué afondaremos n'estudios posteriores”¹⁶.

Cuandu estos investigadores facíen les sos encuestes y trabayos de campu, falaben con homes y muyeres de cincuenta años pa riba, que conocieren los pueblos funcionando asina. Güei, depués de trenta años y por un sacáu de factores de calter socio-económicu y político-administrativu, les coses nun son yá asina na mayoría de los pueblos asturianos, que tán dando les últimes boquiellaes de vida social propiamente aldeana o rural.

¹⁶ Equipu Bueida, “El pueblu quirosán: una unidá social”, *Cultures*, 1, (1991), 84. Tamién pue alcontrase un discursu paecíu en: B.Álvarez Menéndez-J.M.Fernández Hevia-M.Fernández Mier-M.J.López Calvo, “Espacio y propiedad en un privilegio de montaña: La Tierra del Privilexu (Teberga)”, *BIDEA*, 44, (1990), 145-212.